



PAVLVS PAPA V.



AD PERPETVAM REI MEMORIAM. Nuper ad nos perlatum est Religiosos Ordinis Beatæ Mariæ de Mercede Redemptionis Captiuorum prætextu cuiusdam Indulti Apostolici dicto Ordini antiquitus concessi, ac demum per sel. rec. Clementem Papam VIII. Prædecessorem nostrum per suas in huiusmodi forma Brevis literas datas 25. Decembris 1596. Pontificatus sui anno quinto, aboliti, & reuocati, aut forsan alterius, Professores Ordinis Fratrum Minorum Sancti Francisci Capuccinorum nuncupatorum, & alios regulæ strictioris in eorum sodalitem, seu Domos, aut Conuentus recipere. Quare cum id sæpius meritis poenas eludendi causa fiat, & ex

hoc multa scandala in populo generentur, & alia multa incommoda nascantur. Nos huiusmodi scandalis obuiare, & quieti Religiosorum amplius prospicere cupientes, ne quis Prælatorum, seu Superiorum, aut Fratrum Conuentuum, seu Domorum dicti Ordinis Beatæ Mariæ de Mercede Redemptionis Captiuorum, tam in Regnis Hispaniarum, quam alibi consistentium, quauis ille dignitate, præminentia, prærogatiua, vel munere fungatur, prætextu cuiusvis indulti, seu priuilegij Apostolici recipere audeat, vel præsumat causa quarti voti, quod ipsi Professores Ordinis Beatæ Mariæ de Mercede huiusmodi faciunt, Apostolica auctoritate, tenore præsentium, distictè prohibemus. Non obstantibus priuilegijs, seu indultis huiusmodi, ac quibuscumque constitutionibus, & ordinationibus Apostolicis, necnon dicti Ordinis Beatæ Mariæ de Mercede iuramento, confirmatione Apostolica, vel quauis firmitate alia roboratis statutis, & consuetudinibus, priuilegijs quoque indultis, & literis Apostolicis illi sub quibuscumque tenoribus, & formis, ac cum quibuscumque clausulis, & decretis in genere, vel in specie, ac alijs in contrarium quomodolibet concessis, approbatis, & innouatis; Quibus omnibus, & singulis, etiam si de illis, illorumque totis tenoribus specialis, specifica, expressa, & indiuidua non autem per clausulas generales idem importantes mentio, seu quauis alia expressi habenda foret, illorum tenores præsentibus pro expressis habentes, illis alijs in suo robore permanentibus, hac vice duntaxat specialiter, & expressè derogamus, cæterisque contrarijs quibuscumque. Volumus autem, ut præsentium transumptis, etiam impressis, manu alicuius Notarij publici subscriptis, & sigillo alicuius personæ in dignitate Ecclesiastica constitutæ munitis eadem prorsus fides adhibeatur, quæ præsentibus adhiberetur, si forent exhibitæ, vel ostensæ. Datum Romæ apud Sanctum Marcum, sub Annulo Piscatoris, die vij. Iulij M. DC. VIII. Pontificatus Nostri Anno Quarto.

Scipio Cobellutius.

ROMÆ, Ex Typographia Reu. Camera Apostolica. M. DC. VIII.

